

EDITORIAL

DEFICIT DEMOCRÁTICO NA POLÍTICA AMBIENTAL

Os últimos meses aportaron un bon número de actuacións, decisións e resolucións relativas ao complexo eido da xestión do lixo. A aprobación da Lei de Envases e Resíduos de Envases presenta quizá algúns primeiros resultados positivos, ao impulsar a reciclaxe do vidro, o que se traduciu nunha maior actividade de ANFEVI (Asociación Nacional de Fabricantes de Vidro) na Galiza, ainda que logo esta lei supoña un claro apoio á incineración como forma de "valorización".

Pola sua banda, á Xunta entrrou-lle a presa por sacar adiante sexa como sexa o plano de SOGAMA (FENOSA+XUNTA): presionou aos concellos para conseguir deles unha adhesión mais teórica que real, resolveu a dúvida das caldeiras e neutralizou un dictame do Consello Galego do Meio Ambiente crítico co plano.

A espera da subvención de Bruxelas para a incineración, a Xunta saca por via de urxencia unha Lei galega sobre o lixo, rachando coa ponencia unánime dos tres grupos parlamentarios que hai un ano serviu de escusa a algúns para votar en contra da Iniciativa Lexislativa Popular pola xestión ecolóxica dos resíduos. Pouco lle importa á Xunta, neste caso, que nas Cortes do Estado se teña encetado a elaboración dunha nova Lei sobre RSU, coa que poda entrar en contradición, ou que mesmo o próprio plano de SOGAMA esté sen pór a andar e sen demostrar a súa viabilidade (sempre argumentaron que o importante era o Plano), pois a lei que pretenden aprobar ten un obxectivo mui claro e conxuntural: obrigar a todos os concellos galegos a entrar en SOGAMA, elevando por rango de Lei o plano de SOGAMA a plano único e obligatorio para todo o territorio, e convertindo en ilegais, de paso, os planos de recollida selectiva e reciclaxe que están a xurdir (O Morrazo, O Barbanza, A Coruña...). Así, se en duas lexislaturas o goberno da Xunta non conseguiu demostrar a viabilidade e interese do plano de incineración, agora decidiron utilizar a maioria partidaria para salvar un negocio que se lles vai das máns.

Durante as duas últimas lexislaturas, a Xunta ven instrumentalizando partidariamente as inversións e axudas aos concellos, coa finalidade de servir aos intereses empresariais, partidarios e particulares criados entorno ás cuantiosas inversións previstas. A marxinación de calquera concello que leve adiante unha política mais ecolóxica na xestión do lixo, a descarga sobre as povoacións rurais mais desprotexidas dos custos ambientais do plano de SOGAMA (do que son exponentes claros Cereda, Vilaboa, etc), e a prepoténcia do PP no Parlamento Galego marcan un claro déficit democrático que só a rebelión da sociedade e das institucións non alienadas poden superar.

Non é a xestión do lixo o único exemplo dunha política ambiental antidemocrática e contraria aos intereses da povoación: basta con reflexionar sobre o proxecto de encoro para o Úmia e os intereses que están detrás, sobre a inibición no problema das liñas de alta tensión en Merza, sobre a grave incidencia da chuvia ácida na Galiza..., problemas todos eles con un denominador común -FENOSA, para decatar nos de que é imprescindible unha alternativa política ao frente da Xunta. Unha boa nova que agardamos do próximo outono.

CONSELLO DE REDACCIÓN:

Joam Carmona, Elvira Cienfuegos, Emilio Ínsua,
Santiago Ortiz, Xesús Pereiras, Pepe Salvadores, Manuel Soto, Tito Soto.

EDITA: ADEGA (Asociación para a Defensa Ecolóxica de Galiza). Xuño - 1997.

Tanto en artigos como noutras colaboracións, respeita-se a normativa lingüística do autor. CERNA non se fai copartícipe, necesariamente, das ideias, opinións e afirmacións dos autores. Todo o material da revista pode ser reproducido sempre que se cite a fonte, exceptuando as fotografías de portada e contra portada que sería necesario contar co permiso dos autores. CERNA editase en papel reciclado 100 %, para preservar os bosques e contribuir á reciclaxe do lixo. As capas son de papel libre de cloro.

FOTOGRAFÍA DA CAPA
Xan G. Muras

DESEÑO E MAQUETACIÓN
Xan G. Muras

IMPRESIÓN
Litonor

FOTOGRAFÍA DA CONTRACAPA
Pepe Salvadores

FOTOCOMPOSICIÓN
Punto Cardinal

Depósito Legal: C-913-1986
ISSN: 1136-2677



REVISTA GALEGA DE ECOLOGÍA E MEIO AMBIENTE

Telf. e Fax. (981) 57 00 99
Rúa de Touro, 21 2º
15704 Santiago de Compostela